



NOBILISSIMO VIRO DOMINO DOM.
CAROLO GVILLEMEAV,
 CHRISTIANISSIMI REGIS CONSILIARIO,
 MEDICOQVE ORDINARIO, ET SCHOLÆ MEDICÆ
 PARISIENSIS DECANO MERITISSIMO.

NICOLAUS CAPPON Parisinus.

INTER tot circumstrepentes omnium plausus me flere nefas fuit (Vir Clarissime) neque potui prorsus aduersus eos non aliquid tandem afferre, quo & meum in te studium innotesceret; venio scilicet in partem collati à te in amplissimum Medicæ Facultatis ordinem beneficij, quod posthabitis grauioribus negotijs antistitium in ea summi laboribus non solum susceperis administrandum, verum etiam fatiscensem propemodum Scholæ gloriam pristino splendori restituere, ac maleuolorum inuidia ne dicam vel potius furori subducere quotidie coneris: in ea nempe incidimus tempora, quibus vel ab exoleta Circulatorum turba, alme nostre Parentis auctoritas, & qua sola sidera adibat, fama prior infestatur, vel ab ipsis etiam quos genuit illa sineque fuit proprio dilaceratur; adeo valet impotentis animi vitium, aut astus ambitionis, auida que nimium mentis ardor improbus! Etiam hæc tetigit Galene tuos Vtica nepotes. His monstris auerruncandis felici quodam fato tanquam Deus è machina prodisti, huic Lernæ fere velut alter Hercules facem admoisti, numquam ultra seuitura dum Scholæ præeris, dum eam spiritus ille tuus ad magnam solium efformatus animabit. Viue, vale, felicibus vitæ fatis.

Q V Æ S T I O M E D I C A.
QVOD LIBETARIIS DISPUTATIONIBVS MANE DISCVTIENDA
IN SCHOLIS MEDICORVM. DIE MERCVRII V. DECEMBRIS.
M. SIMONE BAZIN Doctore Medico, Moderatore,

An imbecillitati Ventriculi adstringentia?

820

SINGVLÆ corporis nostri partes, quæ vim & vsum habent toti corpori communem, suo tandem officio & munere debilitatæ fatiscunt, sed longè magis quouis morbo imbecilles euadunt; adeo vt partis imbecillitas aliquando morbus sit, aut cuiuslibet morbi symptoma; non est enim nudum & inane nomen imbecillitas. Vt quælibet pars, sic Ventriculus naturalis æconomix princeps, omne genus morbi patitur, simile, organicum, commune: illum intemperies omnis generis, simplex, composita, & quæ humoris est particeps, totius substantiæ corruptela à veneno, vitiosa conformatio, membranarum tenuitas, nonnunquam tumor obstruens, rarò inflammatio, sæpe abscessus in pyloro malis & propè deploratis ægri rebus, aliquando etiam vlcus male afficit; denique morbi innumeri tantò periculosiores quantò cœctio, præcipua illius actio, vniuerso corpori magis necessaria, primæque cœctionis vitium secunda & tertia non emendat.

VENTRICVLVS membranofus & neruofus fibrarum ministerio (in quibus officialium partium *totus* & robur) facultates naturales & administras exercet, rectis attrahit, expellit transuerfis, obliquis retinet, solisne an verò pari omnium contentione? his laxatis, ruptis diuulsivæ, actiones etiam quæ harum subsidio opus suum edebant, vel minuuntur, vel deprauantur, vel penitus abolentur; hinc postmodum aut cibus non appetitur (cuius sensus soli Ventriculo inditus) aut ingestus non facile fertur, sed eo accepto dolor, nausea, singultus, fluctuationis sensus, cibi vomitio, ructus acidus, nidorulentus, excrementis liber aditus, demum omnis cœctio-
nis ratio perueritur; hic affectus rectene resolutio & *æroia* dicitur, illorum prope omnium symptomatum parens?

HVIC morbo maximè obnoxii temperamento humidi, pueri, senes, femina potius, & qui otiosam curisque vacuum vitam agunt, quàm mares disciplinis & laboribus nati, omnium minimè iuvenes, & ætate consistentes, sed eo corrupti periculosius ægrotant; hunc promouent ciborum humectantium colluies, piscium omne genus, potus liberalis, Bacchi indulgentia, oleosa & pinguis, labor à cibo, frequens aquæ dulcis balneum, & pluuiosa ac austrina aëris constitutio. Hyeme autem vt cœctio in omnibus potentior, sic attractio maior, retentio firmior, expulsiuæ robustior; denique prout quævis actio peculiari gaudet qualitate, sic contractio, propria fibrarum & musculorum actio, vt humore soluitur, sic siccitate iuuatur.

INVENIT præsidia vnicuique morbo accommodata salutaris Medicinæ disciplina, quotidianis Naturæ operibus consentanea, quam Medicus rectè operantem perpetuè imitetur, sibi que tanquam ducem & Polydetti regulam proponat. Nunquid mirà illius providentiâ, acerbus, austerus, adstringensque succus à liene in Ventriculum refluit? excitandæ solùm appetentiæ, an etiam firmandis fibris omnibusque earum actionibus roborandis? indèque crassiores densioresque membranæ cibos arctius complectuntur, & calor ille internus cœctionis artifex primarius veluti obice factò contractis vndique poris coërcetur, nec facile aufugit quòd suus fert impetus; hinc in animalibus quæ cœctricis robore ceteris antecellunt, ventriculi membranæ non tenues & dissolutæ, sed densæ probè que compactæ reperiuntur.

VERVM TAMEN hæc ipsa præsidia quamquam Naturæ æmula, plerumque Ventriculi vt & aliarum partium robur & virtutem offendunt, aut quia immodicè refrigerando insitum calorem extinguunt, qui fortasse substantia est virtutum, aut certè primarium ac necessarium ipsarum instrumentum: aut quia alienis & malignis qualitatibus ipsum inficiunt, veluti cathartica, & præcipuè si simplicibus & solis Sennæ foliis content; aut denique quia immodicè relaxant, idè que sine adstringentibus sumptis & admotis nunquam exhibenda. Adstringentia verò, qualia sunt acacia, balauitium, malicorium, mespilus, cotonea mala, aloë, quæ falsò venarum oscula referare dicitur, plantago, rosa, myrthus, absinthiorum genus omne (licet ponticum vt & suauicentia cerebro, sic ventriculo grata aliis præuleris) rhabbarum præ ceteris purgantibus hepati, sic & ventriculo iucundum atque salubre, & ea quæ non tantum purgatrice, sed & subadstringente qualitate pollent: vt quibus à natura non datur, arte adiciatur, vbi purgationis locus: illa laxo ventriculo solutæque compagis fibrarum minimas vniendo particulas, vires addunt, quibus inde collectis Ventriculus suorum officiorum muneribus alacrius fungitur, diutius retinet, fortius expellit, melius concoquit, promptiusque quod est bonum & familiare attrahit.

Ergo imbecillitati Ventriculi adstringentia.

Proponebat Lutetiæ **NICOLAUS CAPPON** Parisinus, A.R.S. H.M.DC. XXXV.

DOMINI DOCTORES DISPUTAVRI.

M. Petrus Legier.
M. Ioannes Chartier, Med. Reg.
M. Ioannes Pietre.

M. Petrus Yon.
M. Claudius Germain.
M. Germanus Treaux.

M. Gabr. Harduyn de S. Iacques.
M. Michael de la Vigne.
M. Iacobus Perreau.

R.M.P.
SOLUTIO